

Date – 12/02/2025

Time - 7:30 -7:40Hrs

REGIONAL NEWS BULLETIN

HEADLINES (MORNING)

- 1. Mizorama Village Council leh Local Council inthlan vote thlak chu nichin dar 7 khan tan a ni a, tun dinhmunah ruahmanna engkim tluang taka kalpui a ni.
- 2. Governor Gen Retd Vijay Kumar Singh an Department pali hotute chu Raj Bhavan-ah kawmin Sawrkar laipui scheme pawimawh tak tak hnuai an hmalaknate leh harsatna tawhte nimin khan a sawipui.
- 3. Prime Minister Narendra Modia chuan AI-in thil a thlak danglam theih dan tarlangin tun kum zabia mihringte awm dan tur duang thei tu a ni a ti.
- 4. President Droupadi Murmu chuan zirna, zirbingna, health care leh Unani system-a damdawi siam kawngah India chu khawvelah a hmahruaitu a ni a ti.

<><><>

VC/LC ELECTION

Mizorama Village Council leh Local Council inthlan vote thlak chu nichin dar 7 khan tan a ni a, tun dinhmunah ruahmanna angkim tluang taka kalpui ni a thudawn a ni.

State Election Commissioner Dr. H. Lalthlangliana chuan Mizoram hmun hrang hranga Village Council leh Aizawl leh Lunglei-a Local Council inthlan vote thlak chu zing dar 7 atanga tlai dar 4 ah neih a nih tur thu a sawi a. Vote hi zan dar 7 atanga chhiar tur niin polling station tina RO ten result an puang dawn a ti.

Dr. H. Lalthlangliana chuan Local council leh Village council inthlanna lo awm turah mipuiten vote an thlak ngei theih nan ruahmanna hrang hrang siam a nih thu sawiin vote nei zawng zawngte vote thlak ngei turin a sawm a. Democracy chu mi zawng zawng mi lian leh mi te inang tlanga sorkar an siam theihna awm chhun ani tih sawiin vote thlak vek turin mipuite a sawm a ni.

(BYTE)

SEC thuchhuah tarlan danin Lunglei District-a Lalnutui ah candidate a boral avangin ni 13 hian vote thlak a ni dawn a. Lawipu Veng-ah nizan khan Local Council candidate congress party a boral avangin nimin khan Lawipui veng inthlan hun hi sawn niin, ni 14 (zirtawpni) ah hemi bial ah hian inthlanna neih a ni ang.

Autonomous District Council awmna tiam lovin, Mizorama district 9-ah hian VC 544 awmin bial 2,416 a awm a. Bial 1,803 te hi tu pawhin chuh theih a nih laiin bial 613 hi hmeichhe tana hauh bik a ni. Bial 2,416 chuh tura hming pelut hi mi 6,829 awmin candidate 5,178 te chuan tu pawhin a a chuh theih bial an chuh a, hmeichhe tana hauh bik bial chuhtu hi mi 1,651 an ni.

Aizawl Municipal Corporation (AMC) huam chhungah hian LC 87 awmin bial/member 575 a awm a, bial 418 chu duh duh chuh theih niin bial 157 chu hmeichhe tana hauh bik a ni. AMC huam chhunga LC inthlan chuhtu hi general seat-ah mi 1,211 leh hmeichhe tana hauh bik chuhtu mi 448 an awm a ni.

Lunglei Municipal Council (LMC) huam chhunga LC 24-ah hian bial 148 awmin mitin chuh theih bial 110 leh hmeichhe tana hauh bik bial 38 a awm a. Mitin chuh theih bialah candidate 309 awmin hmeichhe bial bik chuhtu 108 an awm baw a. LMC hnuai LC te hi an inthlan hmasakna ber tur a ni.

(CORR)

<><><>

GOVERNOR

Governor Gen Retd Vijay Kumar Singh an Department pali; Rural Development, Agriculture, Animal Husbandry & Veterinary leh Fisheries Department hotute chu Raj Bhavan-ah a hran theuha kawmin Sawrkar laipui scheme pawimawh tak tak hnuai an hmalaknate leh harsatna tawhte nimin khan a sawipui a ni.

Governor chuan hmasawna kawnga pawimawh tak, Sawrkar laipui scheme hrang hrang hnuai Mizorama hmalaknate hriat chian mai bakah, harsatna tawhte Sawrkar laipua bawhzui thuai a nih theih nana meeting koh a nih thu a sawi a. Mipuite'n an tana ruahman hamthatna hrang hrangte an hriat chiana an chhawr tangkai theih nan scheme chungchang a pawimawh hrilhhriat leh chhawmdawl kawnga theihtawp chhuah zel turin department hotute a chah a ni.

Governor chuan scheme tangkawp theite pawtkhawma hmasawna ruhrel tha leh rotling siam ngaihpawimawh a tul thu sawiin, Mizorama Self Help Group-te thil siam chhuah, sawngbawl dan leh zawrh tura chhawpchhuah a nih dan chu fakawm a tih thu a sawi a. Hmasawna rahbi thar, loneitute tana tha zawk leh thlanawm tak ngaihtuah zel tura chahin, organic thlai thar chhuah kawngah tan la turin a fuih a. Ran hriselna ngaihpawimawh a tul thu leh sangha thar chhuah kawnga hmalak a tul thu a sawi a. Department hotute chu langtlang leh rintlak zawka hmalak a nih theih nan digitization ngaihpawimawh tel turin a chah baw.

(DIPR)

ASSEMBLY

Tun thla ni 19 atanga tan tur Assembly inkhawm (budget session) atan starred question 557 lehziaka chhan chi (unstarred question) 54 a lut tawh.

Assembly secretariat atanga thu dawn danin zawhna hi sorkar atangin dan siam tura duan pahnih a lut tawh a, House chhunga chhan chi (starred question) 557 a lut tawhin, ziaka chhan chi (unstarred question) 54 leh Resolution 46 a lut tawh a ni.

March ni 20 thleng assembly thutkhawm awm turah hian ni 14 chhung an thukhawm dawn a, February thla ah wawi 2 thu in March thla ah wawi 12 an thu dawn a, Assembly inkhawm tan ni, February ni 19 hian larsap General Vijay Kumar Singh chuan kum khata assembly inkhawm hmasa ber a nih avangin dan pangngai angin Assembly chhungah thu a sawi ang.

Tun tum assembly inkhawmah hian March ni 4 ah finance changtu chief minister Pu Lalduhoma chuan tangka kum thar (2025-2026) atana Mizoram sum hman tur ruahman (annual budget) chu a pharh dawn a ni.

(DESK)

LOK AYUKTA

Mizoram Lokayukta Chairperson Pu Lalmalsawman nimin khan Governor Gen Retd Vijay Kumar Singh hnenah Mizoram Lokayukta Fifth Annual Report 2023-2024 a hlan a.

Annual report hian April ni 1, 2023 leh March ni 31, 2024 inkar a huam a, Mizoram Legislative Assembly-ah pharh a ni dawn a ni.

Governor chuan Mizoram Lokayukta Chairperson Pu Lalmalsawma bakah hian Pu Lalsanglura, Member leh Pu Joel Joseph Denga, Member (Judicial) te chu an hmalakna hrang hrangte sawipuiin, Chairperson-in Mizoram Lokayukta dinhmun leh hmalakna tlangpui a tarlang a. Mizoram Lokayukta hnuaia case neih dan leh bawhzui dante bakah dinhmun leh thlen chinte Governor hi an hrilh bawk a ni.

Annual report-in a tarlan dan chuan kum 2023-2024 chhung khan Mizoram Lokayukta hnuaiah eirukna thubuai case 8 ziahluh a ni a; heng case 8 te hi preliminary inquiry tura tih niin, heng zinga case 7 te report hi dawn tawh a ni. March 2019 a Mizoram Lokayukta din a nih atanga nimin February ni 10, 2025 thleng khan Mizoram Lokayukta hnuaiah case 71 ziahluh tawh niin, heng zinga case 46 te hi chhuizui tlaka ngaih a ni a. Case hearing tum 38 neih tawh a ni a, thiamloh chantir 4 leh thiam chantir 1 an awm tawh a. Department proceeding tura tih case 3 a awm tawh bawk.

(DIPR)

FELI FANAI DIED

All India Radio B Grade Artist Lalnunfeli Fanai - Feli Fanai chu tukin zing dar 2:15 khan a thi. Kum 32 mi a ni.

Feli Fanai hi Ebenezer Hospital-ah a thi a. Natna neuh neuh nei niin, damdawi in a awm chhung hian a hun tam zawk chu ICU-ah enkawl a ni.

Feli Fanai ruang hi, Ramhlun North Industry Mual-a a pute inah chawlhpuai a nih hnua, ambulance hmangin Champhai panpui a ni.

Naupang t  in Zo rimawi khawvelah 'Min Hlan Leh La' music video hmangin a zuang lut a. Heta tang hian thuk zawka rimawi lamah lutin, a debut album a tihchhuah atanga kum sarih hnua, an album pahnihna leh a hnunngung ber tur ni ta chu January 30, 2020 khan a tichhuak leh a, Tuma'n An Tluk Lo — tih a ni.

(PR)

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Wawiin chawhnu dar 2 leh a chanve-ah Chanchinthar hi puan leh a ni ang.

AI SUMMIT

Prime Minister Narendra Modia chuan AI-in thil a thlak danglam theih dan tarlangin tun kum zabia mihringte awm dan tur duang thei tu a ni a ti.

(byte)

Nizana Paris-a AI Action Summit neihnaah he thu hi sawiin Pu Modia chuan mihringten AI thatna an tel vek theih nan khawvel ramte thawhhona tha neih a tul thu a sawi a ni.

Puan tawh angina Paris khawpuia Grand Palais-a khawvel huap AI chugnchang sawihona AI Summit-ah hian Prime Minister Narendra Modia chu French President Emanuel Macron nen Co-Chair an ni a. PM Modia chuan President Macron-an AI Summit a thleng chu lawmawm atih thu sawiin eibar zawinna, venhimna leh khawtlang nunah nghawng tha tak a thlen ang a ti bawk.

(Newsonair)

PRESIDENT

President Droupadi Murmu chuan zirna, zirbingna, health care leh Unani system-a damdawi siam kawngah India chu khawvelah a hmahrulaitu a ni a ti. Nimina International Conference on Unani Day, New Delhi-a a hawnnaah he thu hi sawiin Pi Murmu-i chuan India-a hman uar anih angin Unani System chu Yunan leh Central Asia ahte hman uar a ni ve lo a ti a. Zirbingmite leh a taka thawktuten tunlai thiamna leh kalphung tha zawk nena Unani system tangkai taka an hmang chu lawmawm atih thu a sawi a ni.

He hunah hian Union Minister of Ayush Prataprao Jadhav chuan thusawiin sawrkarin Unani Medicine tihhmasawn kawngah tan a lak thu sawiin damdawi siamdan chi dang dang ramchhunga hman mekte nen mipuiten an tangkai pui hle a ni a ti.

(Newsonair)

<><><>